



RESOLUCIÓN POLA QUE SE ACORDA A CONTINUACIÓN DO PROCEDEMENTO PARA A ELABORACIÓN DE LISTA DE CONTRATACIÓN TEMPORAL NA CATEGORÍA PROFESIONAL DE CELADOR/A GARDA PEIRAOS.

I. ANTECEDENTES E CONSIDERACIONS XURÍDICAS.

Primeiro.- A entidade pública empresarial Portos de Galicia, segundo o disposto na Lei 6/2017, do 12 de decembro, de portos de Galicia, configúrase como unha entidade pública empresarial con personalidade xurídica e patrimonio propio, así como plena capacidade, para o cumprimento dos seus fins.

Segundo o artigo 8 da antedita Lei, correspóndelle á entidade pública empresarial Portos de Galicia o proxecto, construción, conservación, mellora, ordenación, administración e explotación das obras, instalacións, servizos e actividades portuarias, así como a planificación das zonas de servizo e as súas futuras ampliacións. Asumirá igualmente as funcións que, no ámbito de competencias da Comunidade Autónoma, lle poidan ser atribuídas pola Xunta de Galicia en materia de xestión e actuación no dominio público marítimo-terrestre.

O artigo 21, actividade inspectora, da dita lei 6/2017, de Portos de Galicia, dispón que Portos de Galicia exercerá a inspección dos portos e do desenvolvemento das actividades comerciais, industriais ou doutra natureza e de prestación de servizos que se realicen nos mesmos, co propósito de garantir a súa seguridade, a súa eficacia, o cumprimento polas empresas explotadoras e as persoas usuarias das obrigacións que lles correspondan e a observancia das normas técnicas e comerciais de carácter xeral ás que teñan que adecuarse a xestión e explotación dos bens, instalacións ou actividades.

Segundo.- O 11 de marzo de 2020, a Organización Mundial da Saúde elevou a situación de emerxencia de saúde pública ocasionada polo COVID-19 á categoría de pandemia internacional.

O Real Decreto 463/2020, de 14 de marzo, modificado polo Real decreto 465/2020, do 17 de marzo, declara el estado de alarma para la gestión de la situación de crisis sanitaria ocasionada por el COVID-19.

A disposición adicional terceira deste real decreto 463/2020, establece que

“1. Suspendense termos e interrómpense os prazos para a tramitación dos procedementos das entidades do sector público. O cómputo dos prazos reanudarase no momento no que perda vixencia o presente real decreto ou, no seu caso, as prórrogas do mesmo.

2. A suspensión de termos e a interrupción de prazos aplicarase a todo o sector público definido na Lei 39/2015, do 1 de outubro, do procedemento administrativo común das administracións públicas.

3. Non obstante o anterior, o órgano competente poderá acordar, mediante resolución motivada, as medidas de ordenación e instrución estritamente necesarias para evitar prexuízos graves nos dereitos e intereses do interesado no procedemento e sempre que este manifeste a súa conformidade, ou cando o interesado manifeste a súa conformidade con que non se suspenda o prazo.





4. Sen prexuízo do disposto nos apartados anteriores, desde a entrada en vigor do presente real decreto, as entidades do sector público poderán acordar motivadamente a continuación de aqueles procedementos administrativos que veñan referidos a situacións estreitamente vinculadas aos feitos xustificativos do estado de alarma, ou que sexan indispensables para a protección do interese xeral, ou para o funcionamento básico dos servizos....”.

Terceiro.- O Acordo do 15 de marzo de 2020, do Centro de Coordinación Operativa (CECOP), feito público por resolución da Secretaría Xeral Técnica da Consellería de Presidencia, Administracións Públicas e Xustiza, mediante o que se adoptan medidas preventivas en lugares de traballo do sector público autonómico como consecuencia da evolución epidemiolóxica do coronavirus COVID-19, dispón que “En todo caso, considéranse funcións de carácter esencial as desempeñadas polo persoal directivo, así como as vinculadas a funcións tales como a seguridade, mantemento de edificios, comunicacións e outros servizos relacionados coas tecnoloxías da información, pagamento a provedores, habilitacións, gardaría forestal e ambiental, centros de recuperación da fauna e razas autóctonas, as propias do servizo de gardacostas de Galicia, servizos de alertas sanitarias en todas as súas modalidades, servizos de inspección de saúde pública e inspección ambiental, servizos de prevención e extinción de incendios de Galicia, así como todas aquelas que determinen os órganos directivos por considerárense necesarias para garantir a continuidade das funcións básicas”.

Cuarto.- De acordo por tanto co exposto, as entidades do sector público poderán acordar motivadamente a iniciación ou continuación daqueles procedementos que, entre outras circunstancias, resulten indispensables para o funcionamento básico dos servizos e garantir a continuidade das funcións básicas.

Quinto: Por Resolución desta Presidencia do 8 de xaneiro de 2020 publicada no DOGA número 21 do 31 de xaneiro de 2020, acordouse a apertura de prazo de presentación de solicitudes para a elaboración de lista de contratación temporal na categoría profesional de celador/a garda peiraos.

Cara ao desenvolvemento do obxecto social e das funcións que se citan no anterior apartado 1, a figura dos celadores/as garda peiraos resulta esencial por constituír este o persoal ao que dentro da estrutura da entidade pública empresarial se lle atribúen en concreto as funcións de control, inspección e vixilancia sobre a base do establecido nas leis, regulamentos e ordenanzas portuarias de tanta actividade comercial, industrial e de prestación de servizos se desenvolva nos portos, asumindo tamén as funcións básicas de facturación e de denuncia das infraccións sobre a normativa portuaria que se cometan nos portos.

Para realizar as actividades que se citan e garantir nun momento de crise como o actual o mantemento do tecido económico dos portos, se conta na actualidade cunha plantilla de persoal celador moi reducida que, considerando por outra parte as características da costa galega e a enorme dispersión dos portos fai moi difícil asumir a cobertura dos servizos mesmos co cen por cen da plantilla dispoñible, resultando netamente imposible dita cobertura ante situacións de baixa tanto definitivas como en especial temporais que como tales deben de ser obxecto de resposta inmediata.

Acontece por outra parte que nin nas listas para contratación temporal de funcionarios nin de persoal laboral dependentes de Función Pública existe unha categoría equivalente a de celador garda peiraos, e é por elo que seguindo o ditado de Función Pública, Portos de Galicia acomete a tarefa de crear unha lista para esta categoría específica coa que se poidan cubrir as diversas baixas que se produzan dunha maneira áxil e garantindo o mantemento das actividades nos portos.





Resulta por elo necesario que continúen os traballos da Comisión Permanente sen que elo cree situacións de indefensión para os solicitantes, coa realización dos traballos de exame e avaliación da documentación das solicitudes presentadas que estaban pendentes de ser iniciados no intre de decretarse a suspensión do procedemento a causa da declaración do estado de alarma; compre ter en conta que xa para este mesmo verano, época que na meirande parte dos portos é a de máxima actividade (considerando a apertura das fases do plan do Goberno español para a transición a unha nova normalidade), se debe de asumir a cobertura de dúas prazas nesta categoría para vacante, ausencia, enfermidade deste persoal nos portos, e elo ao marxe e sen ter en conta outras baixas que se poidan producir ente o persoal desta categoría e mesmo a eventualidade da cobertura de vacacións, permisos, e outras situacións semellantes.

II. PARTE DISPOSITIVA:

Por todo o exposto, de conformidade co establecido na disposición adicional terceira do Real Decreto 463/2020, de 14 de marzo, polo que se declara o estado de alarma para a xestión da situación de crisis sanitaria ocasionada polo COVID-19, e en canto órgano que ostenta as competencias de alta dirección do persoal da entidade, ao abeiro do artigo 12.3.c) da Lei 6/2017, do 12 de decembro, de portos de Galicia, e conforme ao apartado 4 da Disposición adicional Terceira do Real Decreto 463/2020, de 14 de marzo, que declara o estado de alarma para a xestión da situación de crisis sanitaria ocasionadas polo COVID-19, **RESOLVO:**

Primeiro. – Acordar que se continúe coa realización dos traballos necesarios para impulsar a tramitación do procedemento de elaboración dunha lista de contratación temporal na categoría profesional de celador/a garda peiraos. A tal efecto a Comisión Permanente nomeada para a elaboración e xestión da lista continuará coa tramitación correspondente, ata a fase de publicación de listas provisionais de admitidos/excluídos e notificación xeral desta aos interesados.

Segundo.- Publicar esta resolución na Páxina Web de Portos de Galicia, no Apartado de “Recursos Humanos”, subapartado de “Listas de selección de persoal interino ou temporal”, sen prexuízo de que se poida notificar directamente a cada un dos aspirantes/solicitantes, coa indicación de suspensión do prazo de subsanación indicado nas bases do procedemento para o trámite de listas provisionais.

Contra a presente Resolución, que pon fin a vía administrativa, poderase interpoñer recurso contencioso-administrativo ante o Xulgado do Contencioso-Administrativo de Santiago de Compostela, no prazo de dous (2) meses contados dende o día seguinte ao da notificación deste acordo.

Non obstante, o interesado poderá optar por interpoñer contra esta resolución recurso de reposición no prazo de un mes contado a partir do día seguinte ao da súa notificación, perante o mesmo órgano que a ditou, de acordo co disposto no artigo 124.1 da Lei 39/2015, do 1 de outubro, do Procedemento Administrativo Común das Administracións Públicas.

A PRESIDENTA

Susana Lengas Gil

